



...Che l'inse?!

BALILLA

OVVERO: DELLA GENOVESITÀ

di Maria Terri Vietz

E parlemmone un po' de questo personaggio che, insando 'na p̄ria o l'ha intissou i zeneixi a-a solidarietæ con l'exitò che tutti conoscemmo.

A monito e regordo han incastrou in ta pavimentazion, a l'incomenso de Portoia, 'na lastra co-a dæta de l'evento a perenne memoia di posterì.

I posterì e a solidarietæ: dove son? E se ghe son i posterì, ò san còs' a l'è l'ätra parolla?

Tutti i anni, a-o 5 de dexembre o Comune de Zena e l'Associazione "A Compagna" ònoran questa dæta mettendo 'na coronn-a d'òfeuggio ai pè do monumento de questo eroico battuso. Al'è 'na breve cerimonia, fæta de quarche accenno storico, de commenti e considerazioin che l'orató do momento o spiega ai presentì.

Ecco, i presentì. Quest'anno l'orató de turno ò mi. Devo dí che son restà de sà.

In sce quello bordo de marciapè, paivimo un gruppo de imputæ in atteisa de traversà a stradda pe intrà a Palasso de Giustizia. Saiemo stæti sci e no, 'na ventenn-a, compreixi dui "cantonè" in divisa metropolitann-a e ätri dui in "alta tenuta", immobili in sce l'attenti, senza parpellà, che ho

ancon d'accapì se èan veri o finti; o solito Mazzarello co-o gonfalon da "Compagna", o solito Daccà che ormai o l'è comme l'erba bettonica e o solito Baglini attento scrutató do svolgimento in question.

Naturalmente parlo solo di componenti de quello ch'o dovieva èse o Consolato, perché di iscrìti, soci e no, gh'èa e solite facce de "aficionados", pe nommà i quæ basta e díe de due man e che profittando de questo scrìto ringrazio pubblicamente.

Anche o Comune, o n'ha brillou comme presenze; a parte i dui cantonè ch'o nominou primma, l'è arrivou un Assessore (domando scusa, no regordo o nomme) che o no saveiva manco de dovei parlà, ma che comunque o se l'ha cavà con molto stile e decoro. Di ätri componenti de l'Uffissio do Cerimoniale, manco l'ombra...Bene!

Poscibile che di Consoli in nomina, ghe ne fuse solo un? Sci, sci o sò. O travaggio, appuntamenti, impegni de genere vario, a famiglia...ma o semmo o no, scignori, che quando s'accetta 'na càrega, quante ciù a l'è importante, tanto ciù l'è doveroso assolve l'impegno? E me sbaglio se diggo che quante meno beseugna giustificäse? Pesta o diao se ghe n'è stæto un ch'o l'agge fæto. Scignori, foscia l'etæ a me permette de scioglie a lengua e questo o vā anche pe tutti i soci e pe tutti i scimpatizzanti, ma a solidarietæ, dove l'emmo caccià?

Èse solidali veu dí risponde ai reciammi di nostri intenti, parteçipando anche co-a sola presenza, discute con noiatri, rattellà, criticà.

Tutto concòre a l'interesse comune do nostro èse zeneixi in sce-o serio, unii e fattivi pe agì e dāne 'na man a procede sempre mëgio.

No basta dāne raxon standosene assettæ in sce-a càrega a-o càdo, quande 'na magnà de volenteroxi a sfidda o tempo e a vā pe-e stradde a testimonià davanti a-o monumento de Balilla che i zeneixi gh'en ancon!...

Sic stantibus rebus...